

Attualité

Dancà y da na pert

Uedli y oredles daverc sun la sozieté ladina d'aldidancuei

Iacun Prugger

Studènt, nseniant, atleta y ornitologh de Urtijèi



Co vâla pa cun i uciei?

Dut a post. Deberieda cun mi cumpanies ons abù na bela atività d'ansciuda, canche son stai a piè y anelé uciei a Kaltern, a Laion y tl aeroport de Bulsan. Sèn fej i uciei coa y d'autonn jiràla inant cun nosta atività sun Sela de Culac sot al Jëuf de Frea y sun Mont de Sëuc.

Iel pa sautà ora zeche de nteressant y de nuef?

A Laion, cun la sienes ju per ch'i ronesc che ie n beliscimo habitat drèt naturel per i uciei, iel for drèt nteressant a fé chisc studi, ajache l ie suvènz da udèi sortes nueves de uciei, che n ne se aspitèssa nia tlo da nèus, che ne toca perdrèt nia tlo da nèus, ma che ie mpo de passaje, coche l pirol.

A tennis, co àla pa butà?

Feje bele da n valgun ani incà pea cun l TC Laion. A nivel de squadra ons fat pea l campionat provinziel, ruvan amez ite. Persunalmènter me àla drèt butà.

Sëis nce campion de Gherdëina.

Sci, nce iló àla drèt butà.

Vo fajëis nce a Schach. Sëis'a jit a ti cialé al turnoi de Urtijèi l'ena passada?

Sci, son stat su te Cësa di

Cungresc, deberieda cun na tlas dl Lizeum d'Ert de Urtijèi. L ti à sapù nteressant a udèi n iede zeche d'auter, cun chisc gran maestri che pensova su per ch'i tapli, tl gran chiet dl turnoi.

Vo nsenieis matematica y fisica tl Lizeum d'Ert. Ie pa i sculeies stac valènc via per l ann? Sëis'a cuntènt che la scola fina via?

I sculeies y la sculées dl Lizeum d'Ert ie for valènc y drèt lezitènc. Do n ann de lëur sons nce ie cuntènt che la fina via, che pudon se goder l instà.

Vo studieis matematica a Trènt. Te ciun ann sëis'a?

Son tl segundo ann y l va marè inant; spere de vester bon de finè dant o do.

D'instà sëis pona sa Pilat a siè y a fé l paur?

Sci, bel plan scumència la sajón dl siè. Sambèn che la ierba crèsc y vèn for plu y plu longia. Muesse dì che l lëur da paur vèn fat tan che dut da mi pere Gregor, n puech judi nce ie pea, deberieda cun mi fra y mi surans. Sa Pilat iel for bel, nce ajache n à na bela gheneda te una dla plu bela lueges dla valeda.

Ntervista de David Lardschneider